



358

D

33











10  
247 B32g  
358  
353

PANEGYRICUS  
dictus  
*SERENISSIMO AC POTEN-  
TISSIMO PRINCIPI*  
**FRIDERICO III**

MARCHIONI BRANDENBURGEN-  
SI, SACRI ROM: IMP: ARCHI-  
CAMERARIO

ET ELECTORI,  
DUCI BORUSSIÆ, MAGDEBURGI,  
JULIÆ, CLIVIÆ, MONTIUM,  
STETINI, POMERANIÆ

&c: &c: &c:

PIO, FORTI, FELICI,

IN

ACROATERIO MAJORE  
LYCEI TRAJECTINI

die IV Junii Anno MDCXC

à

CHRISTIANO ALBERTO de MEINDERS  
Nobili Marchico.

---

TRAJECTI ad RHENUM,  
Ex Officina FRANCISCI HALMA, Academiae Typographi  
c15 l3c xc.

PATENT  
FRIEDRICH III







ILLUSTRES ET PRÆPOTEN-  
TES POPULI TRAJECTINI  
ORDINES, ELECTI, EQUITES,  
MAGISTRATUS. GENEROSIS-  
SIME PRÆTOR. NOBILISSI-  
MI ET AMPLISSIMI CONSU-  
LES ET SENATORES, ACADE-  
MIÆ CURATORES. GRAVIS-  
SIMI CURIÆ PROVINCIALIS  
SENATORES. MAGNIFICE RE-  
CTOR. CLARISSIMI PROFES-  
SORES. CASTISSIMI VERBI  
DIVINI PRÆCONES. DOCTO-  
RES OMNIUM FACULTATUM  
ERUDITISSIMI. HOSPITES, CI-  
VES, INCOLÆ, OMNIUM OR-  
A 2 DI-

DINUM, GRADUUM, ÆTATUM, HONORATISSIMI. TUQUE LECTISSIMA JUVENTUTIS CORONA.



I oculos nostros rejicimus in tempora illa, quibus gravissimum belli incendium, quo nunc omnes terrarum partes flagrant, arcano factorum decreto exarsit, sique rite perpendimus, quæ postea pro afflictissimæ patriæ salute, proque sociorum incolumitate præclare prospereque ab iis gesta sunt, qui summa animorum consensione, mirificaque concordia arma contra communem hostem ceperunt: non possunt non tam læta, tamque optata rerum commutatione omnium bonorum animi incredibili quadam lætitia perfundi, Deoque, qui sapientissimo nutu res mortalium moderatur, cujusque summo ac singulari prorsus beneficio, ex gravi quodam metu recreati sumus, gratias agere immortales. Jam enim hostis, humanæ conditionis immemor, improba spe orbis terrarum dominium devorave-



raverat, superbiæque isti, qualem nulla ætas antea vidit, novum quoddam ac prorsus stupendum crudelitatis genus adjecerat. Constituerat quippe, quod vix credet posteritas, quodque non absque summo horrore refero, domus nostras, communia hominum refugia, delere; templa, in quibus summum illud æternumque numen precibus & laudibus prosequimur, exscindere; pro vero ac castissimo Dei cultu, fictum falsumque inducere; Germaniam, tot Principum matrem, tot heroum patriam, cæde ac incendio vastare; fortunatissimum hoc & pulcherrimum Belgium, ocellum mundi, evertere; denique, quod nec sempiternus Christiani nominis hostis, Thracicus Imperator, unquam videtur optasse, in cinere perditarum gentium ac vestigiis deflagrati orbis imperium collocare. Debeamus nostris malis, quod luctuosus rerum eventus, infensaque nobis fortuna per aliquod tempus, & antequam a nostris ad arma ventum, Gallorum conatibus responderet. Quis enim est nostrum, qui ignoret, quique non cum summo dolore cogitet, quousque hostium immanitas processerit? qua plus quam barbara diritate isti, regiones, quarum ubertate & pulchritudine

B

tudine omnes gentes capiebantur , vastaverint? ut, ubi olim urbes, castella, vici conspiciebantur, nunc tristissima pristinae felicitatis monumenta, urbium excisarum cadavera, vastissimæque solitudines extent. Eandem illi pestem illustrissimæ huic Reip. minabantur, & fortassis nobilissima hæc provincia, pulcherrima & amoenissima hæc urbs, sanctissimum denique hoc ipsum honestissimarum disciplinarum, artiumque domicilium, nefarii hujus belli flamma corruissent, si res ex hostium votis cecidisset. Verum, uti mortalium conditio suas habet vices, ita post plurima acerbissima patriæ fata, gravissimamque tempestatem, qua multum quassatæ fuerunt beatissimæ quæque Europæ regiones, Deus pro singulari suo in nos amore, aliquid lucis ostendit, nosque, summoto paullo longius a cervicibus nostris horribilis hujus belli periculo, de felici ejus exitu, ac de patriæ salute optimam spem concipere jubet. Idem enim hostis, qui toti terrarum orbi bellum indixerat, quique secundo rerum successu inflatus, magnitudinem fortunæ non capiebat, nunc non tam de finibus imperii proferendis, quam de bello tantum a suis limitibus propellendo ac propulsando sollicitus



citus est, ac ne illa, quam in omnes machinabatur, pestis, justissimo Dei judicio in se aliquando conferatur, pertimescit. In hac autem Europæ scena bellica primas fere partes egit Serenissimus & Potentissimus Imperii Romani Octovir Brandenburgicus *Fridericus* III. Quanta enim alacritate bellum hoc suscepit, quanta virtute illud gesserit, quantaque felicitate hostes plus vice simplici superaverit, loquuntur omnes, qui superioris anni casus & varietates norunt, quique non ablati cupiditate aut nimio studio partium occæcati, verum vident aut dicunt. Ille ad hoc bellum administrandum divino quodam consilio oblat, ille quasi de cœlo in salutis nostræ præsidium demissus videtur, ille ad bene sperandum de afflictis sociorum rebus, de miserorum fortunis, de servanda patriæ libertate, in ista temporum calamitate, rerumque pene omnium desperatione, primus quasi signum aliquod sustulit. Tu nobis, *Serenissime Princeps*, Tuis periculis securitatem, Tuis laboribus quietem, Tuo consilio salutem peperisti. Tu urbes munitissimas, quas hostes dolo & artibus ceperant, virtute recuperasti, illosque e plurimis locis, quæ tenebant, ejecisti. Tu hostes,

B 2                      qui

qui fortunis gentium, qui libertati, qui vitæ, quibus nihil dulcius homini a natura datum, inhiabant, incredibili quadam felicitate cohibuisti, Tu furorem Gallorum, crudelissimis consiliis concitatum, a perniciæ populorum tuorum avertisti, illorumque vitam, bona, liberos, uxores ex flamma, ex ferro, ac pene ex funesti, quod illis impendebat fati faucibus, eripuisti, Tu denique iniquissimi hujus ac teterrimi belli periculum a sociorum tuorum terris ac finibus depulisti. O felices populos! qui talem nacti sunt principem, qui ipsos, rebus adversis dejectos, sublevare, quique non solum instar indulgentissimi Parentis ipsos regere, sed & omnia & fortunæ & bellorum tela ab illorum cervicibus avertere, inter primas vitæ curas ducit. Felices socios! quibus obtigit socius, qui ipsorum salutem omniratione tueri & potest & desiderat. Felicem Germaniam! quæ gaudet Principe, qui pro illius dignitate, nullos labores, nulla pericula subire refugit, quique pro ipsius salute spiritum ipsum ac vitam profundere dulce ducit ac decorum. Maximo ac gravissimo luctu obruebantur omnes, cum *Friedericus Wilhelmus Magnus* ex hac vitæ statione, qua ad extremum vitæ tempus cum omnium



omnium gentium admiratione functus erat, a superis evocaretur. Dolebant exteri, qui aut nascendi forte in illustri loco positi sunt, aut virtutem in aliis mirantur, extinguere illud Imperii lumen, illum Principem, in quo nihil nisi altum, nisi sublime, aut excelsum erat, quique summorum Principum gloriam fortuna & potentia æquabat, plurimos quoque virtute, sapientia, consilio, meritis, omnibus denique pacis bellicque artibus superabat. Querebantur cives, ereptum sibi Patrem patriæ, qui, ut ipsi beati ac felices essent, semper allaborasset, cui infinita felicitatis ornamenta deberent, quique afflictis & prostratis patriæ rebus, omnia pericula a se avertisset. Vulnus, quod hæc clades illis infligebat, nullo tempore sanari posse videbatur, neque dolor, quem ex tam gravi jactura capiebant, leniri potuisset, nisi divina providentia, quæ *Fridericum Wilhelmum* rebus humanis eripuerat, *Fridericum* III, veram tanti patris imaginem, ab ineunte ætate, ex plurimis periculis, in spem solatiumque omnium servasset, eumque in gloriosissimo isto ac cellissimo majorum suorum folio collocasset. Itaque inter ipsas lacrymas, quas in funere maximi Parentis subjectæ scepro Branden-  
C                      burgi-



burgico gentes profundebant , gratissima quædam ac perquam copiosa lætitiæ seges efflorescebat, cum viderent, non minorem filium imperii gubernacula suscipere. Animadverterant quippe in *Friderico* III, in tenera jam ætate , quæ nullis simulationum involucris aut velis obtenditur, indolem quandam, quæ ad omne virtutis decus veramque gloriam, sua sponte ac inductione quadam animi ferebatur. Sciebant, illum a viris, quorum virtus ac sapientia in totius terrarum orbis conspectu posita est, non minore cura quam felicitate iis artibus ac disciplinis eruditum esse, quibus Principes ad maximum fortunæ cultum, atque ad tot gentium gubernationem nati, erudiri solent. Accedebat, quod pulcherrimum in Principibus decus est, mirifica in Deum religio, magna in omni vita lenitas ac clementia, incredibile omnibus bene faciendi studium, singularis animi magnitudo, summa in rebus prosperis & adversis aut moderatio aut constantia, divina tandem prudentia. Quæ tum in omni vitæ cursu, tum vero tunc maxime eluxit, cum in consilium Magni Parentis adhibitus, virisque sapientissimis affidens, de rebus maxime arduis, deque negotiis gravissimis eas ferret sententias, quas  
ferre

ferre solent, quorum prudentia velut lumen aliquod elucescit, quique usu & exercitatione rerum quam maxime valent. Tantum abest, *Princeps Optime*, ut passus fueris cives tuos cadere summa ista ac pulcherri-  
ma spe, quam de Te conceperant, ut eam longissime superaveris, dum omnes, qualem Te olim futurum speraverant, nunc talem esse, cognoscunt, & ubique prædicant: ac quarum virtutum olim in Te quasi herbescentem viriditatem viderant, earum maturitatem, lætitia pleni, in Te nunc admirantur. Quanta Tu animi moderatione imperii clavum, quem a Deo Tibi traditum sciebas, quemque cum multis molestiis, curis, ac periculis conjunctum nove-  
ras, suscepisti! quanta cura Tu illum susceptum postea tractasti! Cum enim judi-  
cares, Te non solum Tibi, sed & patriæ, populisque Tibi traditis natum esse, nihil humanarum rerum Tibi prius agendum putasti, quam ut imperium, quod cum omnium applausu adieras, tanquam pater patriæ administrares, utque illi, qui potestati Tuæ a Deo commissi sunt, quam beatissime viverent. Vix adscenderas summum illud fastigium, cum ipse omnia, quæ ad Rempublicam bene gubernandam ne-  
cessa-



cessaria videbantur, circumspiceres, ordinares, ac obires, omniaque, quantum humana ratione provideri poterat, prudentissime constitueres. In quo tanta, tamque excellens Tua fuit industria, ut, cum cives Tui in utramque quasi aurem securi dormirent, Tu pro ipsorum securitate & commodis vigilares, semperque, posthabita valetudinistuae ratione, æstivo tempore, summo mane, vel ante solis ortum, ad negotia curamque imperii provolares, quasi ferre non posses, ut pulcherrima hæc coeli lux in recreandis ac fovendis mortalibus, Tuam anteverteret industriam. Omnes etiam admirabantur sapientiam Tuam, qua legisti viros, quos adhibes in tot populorum, Tibi parentium, salute procuranda, quorum fides, prudentia, virtus, vel in Tuis, vel in Parentis Tui negotiis Tibi jam erat spectata, quibusque Tuis, communisque patriæ commodis, dignitate, salute, nihil antiquius esse, habebas exploratissimum. Num quis unquam Princeps plus curæ & studii, num majores sumtus impendit ad arcendam foris omnem vim, ac ad propulsandum omnem hostilem impetum? Providisti *Friderice*, ut & ducum & militum lectissimorum copia Tibi esset præsto, quorum opera & virtute  
utere-

utereris, non tantum in tutelam Tuorum finium, sed & ad suppetias ferendas vicinis gentibus. Foedera olim cum aliis inita renovabantur, & nova percutiebantur. Ne patriæ vires digladiationibus attererentur, & cives ei utiles, vana persuasione virtutis ad dignitatem quasi suam asserendam, singularibus certaminibus consumerentur, neve de patrimoniis & bonis suis solliciti essent multi: latæ leges saluberrimæ, quarum aliæ ad quietem publicam stabilendam, ac hominum in mutuas cædes ruentium licentiam coercendam, spectabant, aliæ vero illos bene de fortunis ac bonis suis sperare jubebant, qui ea, quæ juris fiduciarii leges requirunt, neglexerant. Bono cuique, *Friderice*, suus honos, sua dignitas, suum munus, quod a Parente Tuo consecutus fuerat, constabat, ut Tibi, secundo fortunarum suarum fundatori, non minus quam primo illi auctori, debere se fateantur & grati agnoscant. Qua divina benignitate animos omnium ita Tibi devinxisti, ut, cum omnes omnia vitæ commodatque ornamenta Tibi accepta referant, nemo sit, qui vita ac sanguine salutem tuam redimere, si occasio tulerit, recusaturus sit. Denique in id unice incumbebas, id a-

D                   gebas



gebas, ut consuleres omnibus, medereris hominum incommodis, provideres saluti, ut parens tuorum & dici & haberi posses. Hæc prima Tua fuit cura, hoc unicum Tuum studium, a quo nullæ molestiæ, nulla pericula, nullus somnus, nullæ denique res, siue jucundæ illæ essent, siue asperæ, coelestem Tuum animum avocabant. Viget, vigebitque per omnium seculorum memoriam memorabilis ista ac eximia pietas, qua Divum Tuum parentem semper coluisti, cujus Tu, cum post ejus obitum nullum, ut ante hac, documentum edere posses, quod solum poteras, edidisti, Ipsumque splendidissimo & honestissimo funere, quale tanto fastigio conveniebat, extulisti. Magnis laudibus celebratur Rex Macedonum Alexander, qui, cum parens Philippus excessisset ex vita, primam curam paternarum exequiarum habuit, sed ejus Tu & pietatem, & in curando funere apparatus longe superasti. Namque & summo cum luctu, quo quam maxime filii parentum memoriam honestant, in funus prodibas, & cum incredibili magnificentia & regio sumtu ejus corpus in majorum Tuorum monumentum inferebas, comitante maxima exercitus



tus parte, ingentique hominum omnis ordinis ac dignitatis multitudine, quæ ex omnibus regionibus Tibi subjectis, jussu Tuo ad decorandas Patris Tui exequias confluxerat. Videbatur quidem, *Friderice*, cum, parente condito, Imperii clavo manum admoveres, alta pax & summa tranquillitas esse, de qua & *Fridericus Wilhelmus*, qui inter perpetuas bellorum tempestates vitam transegerat, ante obitum sibi gratulatus fuerat, neque, quod mirandum, antequam ipsius corpus humatum esset, bellorum strepitus audiebatur, quasi ipsa arma religioni duxerint, funeri Principis, qui in omni bellorum genere & maximus & invictus fuerat, obitreperere. Verum inciderunt imperii tui auspicia in tempora tumultuosissima, plena barbarum & insidiarum, secretisque consiliis ea tum miscebantur, quæ paulo post eruperunt, ita, ut nonnullæ ex Tuis legionibus a patrio funere in bellum, atque ad speratum victoriæ decus proficiscerentur. Galli namque, qui diu terrarum orbis libertati infidiati fuerant, cum omnes specioso nomine, & umbra induciarum, quas ante paucos annos ipsi pacti erant, fallerent, ac si nulli quicquam hostile metuendum esset, nullo bello provoca-

D 2                      ti,

ti, nullis injuriis laceffiti, fpreta, quam de-  
 derant, fide, poft habitis divini humani-  
 que juris præceptis, ruptis fanctiffimis na-  
 turæ ac gentium legibus, quafi ex infidiis,  
 iniquiffimum prorfus ac impium bellum  
 Germaniæ movebant, eodemque tempore,  
 quo illud declarabant, infesta fimul figna in  
 ipfa Imperii Germanici, Turcico bello di-  
 ftricti, viscera transferebant. Omnem tra-  
 ctum Rheni, Spiram, totumque Palati-  
 natum ac agrum Colonienfem, fubito nec  
 opino fupervenientes, occupaverant vel  
 opprefferant. Udenhemium, quod ab  
 omnibus ad hoftium vim arcendam neces-  
 fariis nudatum erat, arctiffima obfidione  
 claudebatur, &, quod necelfe erat, ca-  
 piebatur. Moguntia a Gallis tenebatur. Ri-  
 pa Rheni confita erat caftellis, quæ Galli  
 contra pacem Monafterienfem tanta cura,  
 tot annorum labore, tantaque contentione  
 totius Europæ fancitam, in fpem impiæ do-  
 minationis, quam moliebantur, extruxe-  
 rant. Imperator graviffimo bello in Pan-  
 nonia contra perpetuum Chriftianorum ho-  
 ftem diftinebatur. In Germania aliorum vo-  
 luntates dubiæ erant, aliorum obfcuræ. Re-  
 gis Hispaniarum res non ferebant, ut Ger-  
 maniæ fubveniret. Anglia Gallis foedere  
 juncta



juncta erat. Septentrionis Reges veteres  
 similitudines mutuusque metus retinebat, ne  
 ad foederatorum populorum injurias vindi-  
 candas expedirent arma. Belgarum studium  
 in liberanda Britannia versabatur, & in  
 bello suis finibus arcendo, ita, ut & tempus,  
 & ipsa rerum facies per totam Europam,  
 Gallorum consiliis, quæ ad illam perdo-  
 mandam agitabant, favere viderentur. In  
 hac temporum atrocitate, rerumque om-  
 nium perturbatione, ubi Germaniæ li-  
 bertas, Principum dignitas, Belgii incolu-  
 mitas, omnium vita, sanguis, religioque  
 ipsa in discrimen vocabatur; *Serenissimus*  
*Octovir*, divino consilio, magnoque & ex-  
 cello animo facile prospiciebat, si illo tem-  
 pore dormiretur, crudelem superbamque  
 dominationem esse subeundam, & igno-  
 miniosam prorsus servitutem serviendam  
 omnibus. Itaque omni cogitatione ad  
 Germaniam liberandam, ad patriæ decus  
 tuendum, sociosque defendendos fereba-  
 tur. In hoc omnes curas locabat, nullum-  
 que neque diurnum neque nocturnum tem-  
 pus amittebat ea providendi & parandi,  
 quæ temporum necessitas flagitabat. In-  
 struebatur omni ratione bellum, habeban-  
 tur delectus, augebantur veteres legiones  
 E novis

novis supplementis, illa ipsa exercitus pars, quæ, in Borussiæ tutelam, in illa posita erat, ad restinguendam asperrimi belli flammam, jam late ad Rhenum omnia depascentem, advolare jubebatur, licet ejus opem florentissimæ regionis securitas maxime desiderare videretur. Conveniebat *Sapientissimus Octovir* ipsemet nonnullos Germaniæ Principes, non satis præsidii in literis & nunciis, quod plerique omnes faciunt, esse positum existimans, ipsosque, ut difficillimis istis temporibus, dextras promte porrigerent, & mutuis foederibus patriæ salutem fulcirent, suo consilio, suoque exemplo inflammabat. O egregiam *Friderici* erga Germaniam voluntatem! O verum patriæ patrem! Mirificus ille in patriam animus, ardentissimumque juvandæ Germaniæ desiderium, nonne pulcherrimis istis coeli sideribus est simile, quæ nocturno tempore, cum omnia tenebris involvuntur, mortales, ipsa caligine trepidos, luce sua recreant, ut quasi pro ipsorum salute videantur excubare? Non enim satis habuit *Princeps Optimus*, Coloniæ Ubiorum, missis illico auxiliis, quod & magnæ ejus Parens anno superiore fecerat, ab injustissimo servitutis atque expugnationis periculo defendere, sed & Francofurto,



cofurto , antiquissimæ Imperii civitati , ubi tot diademata Cæsaribus imposita , in maximo , quo septa erat , discrimine , suppetias tulit ; quoque & promptius & melius illi succurreretur , ipsas cohortes prætorias misit , ut quasi altera manu superiorem Rheni partem , altera inferiorem tueretur. Quod Geldria , urbs & natura loci & manu munitissima , cum circumjacente agro , finitimisque gentibus , vi ac incursionibus hostium liberata sit , debetur *Friderico* III ; qui , quod Hispani petebant , validissimum illi præsidium imposuit , quod suo sumtu aluit. Quid vero dicam de incredibili isto amore , quo *Princeps Maximus* illustrissimam hanc Remp : tanquam carissimam sororem , semper complexus est , qui , uti olim cum Arausionensium sanguine in ipso utero materno ipsi infusus erat , ita postea semper cum ætate crevit , magisque indies exarsit. Illum qui certioribus poterat argumentis declarare , quam cum amicissimæ Reip. aliquot hominum millia ex optimis & vetustissimis legionibus selecta , mitteret ? hanc unam ob causam , ut bellum , quod Galli jam dudum illi decrerant inferre , quodque jam illius jugulo impendebat , arceretur , utque divinum istud consilium , quod *Guilielmus*



III. fulmen belli, & ætatis nostræ miraculum, de afferenda Britannia ceperat, felicius succederet, uti felicissime successisse, non longe post, Orbis terrarum, summo cum stupore & applausu vidit. Singularis autem herois hujus pietas, summumque stabilien-  
dæ purioris religionis studium, quam gra-  
tum, quamque acceptum fuerit immortalis Numini, ex hoc eluxit, quod illum cum sanctissima Coniuge, mirifica consensione Britannia, quam sine cæde & sanguine libera-  
verat, postea in illud solium evexerit, quo nemo dignior erat, & ad quod occupandum, ipsa Dei manu ductus videbatur. Mirabantur omnes, qui aut prudentia atque usu rerum exercitationeque aliis præstabant, aut rei militaris scientia florebant, Gallos fatalem sibi *Guilielmi* III discessum in Britannos non impedire conatos fuisse, atque ita egregiam istam occasionem, in beatissimas Belgii provincias, quibus semper inhiaverant, ir-  
ruendi, totamque Britanniam sibi servandi, prætermisisse: Verum illi, quasi iustissimum numen ipsorum oculorum aciem habetasset, in sua fata ruebant, ac, neglecta prope explorata facultate terras has occupandi aut infestandi, ne possent aliena respicere, contra datam fidem, ac præter omnium expectatio-

etationem Germaniam invadebant: certissimo documento, bella Dei decreto suscipi, magna sæpius illorum poena, qui ea movent calide: in Dei manu esse mentes Regum, etiam potentissimorum: eumque illorum, qui prudentissimi habentur, consilia corrumpere, quando eorum fortunam mutare constituit. Quid Germani peccarant? quo vos dicto factove irritarant Galli? quam vobis causam dederant impia ac nefaria arma contra ipsos capiendi? Nullam prorsus. Fidem servarant, leges induciarum, quæ convenerant, non læserant, multa iniqua, quæ vos contra pactorum fidem quotidie moliebamini, tulerant, ad præcidendam omnium novarum turbarum ac tumultuum occasionem. Quod si hæc in culpam transeunt, si flagitium est fidem sanctissime colere, in foederum pactione summa fide manere, si supplicium meretur, qui quiete pacateque agit, crescentemque aliorum potentiam æquo animo intuetur: & graviter peccavit Germania, & gravissima quæque meretur supplicia. Si enim prisca illa & omnium gentium scriptis celebrata Germanorum fides, si religiosissimum illud foedera servandi studium, a remotissimorum seculorum memoria unquam apparuit:

F

certe



certe illud, omnium iudicio, isto tempore clarissime eluxit. Verum non illibata hæc fides, non reverentia summi Numinis, violati jurisjurandi vindicis, non denique injustissima bellandi causa, in animis hostium, nil nisi bellum spirantium, ac cædes anhelantium, sacram illam & indomitam aliena invadendi libidinem retundere poterat ac coercere. Cum igitur injustissimo hoc bello omnem Germaniam provocarent Galli, omnes ad commune belli incendium restinguendum, properabant. Nunquam in Imperio Germanico tanta fuit voluntatum consensio, nunquam tanta animorum concordia, nunquam ad dignitatem, salutem, ac libertatem Imperii tuendam, ad labentem Remp. erigendam, tanta fuit omnium Ordinum omniumque hominum conspiratio. Hunc tantum animorum consensum cum Galli viderent, quem futurum esse, sibi persuadere non poterant, male causæ suæ ominabantur, ac propterea maximos Reges & potentissimos Imperii Principes in partes suas trahere promissis, minis, largitionibus, variisque artibus nitebantur. Nihil inprimis studii, nihil operæ, nihil contentionis sibi reliquum faciebant, ut *Fridericum* maximis, quæ promittebant, præmiis expu-



expugnarent, ut aut suas, aut neutras partes sequeretur, sed medium se præberet. Verum celsus ille & magnus animus, qui semper de patria præclare sensit, ac qui nihil fordidum, nihil humile unquam admisit, nullis speciosis lenociniis Gallicis, nullis pollicitationibus, ne Attalicis quidem quæ proponebantur conditionibus, potuit moveri, ut sua commoda patriæ caritati præponeret, utque in Germanorum cæde ac sanguine, in splendidissimarum & antiquissimarum urbium excidio, ac inter flebiles oppressorum gemitus desideret, ac solus salvus esse vellet & incolumis. Res est dignissima, Auditores, quæ memoria posteritatis alatur, quæque nullius temporis longinquitate obliteretur. Galli per suos oratores ac amicos maxima quæque *Friderico* pollicebantur; sed hic majore animo respuebat omnia. Illi amicitiam potentissimi Regis offerebant; hic in Germaniæ clade Germano Principi eam indecoram putabat. Illi provincias Electoris nihil detrimenti passuras confirmabant; hic, auribus ad omnes blanditias obduratis, suorum fortunam a patriæ fati sejunctam esse nolebat. *Æquasti, Friderice*, æquasti pulcherrimo hoc facinore Epaminondæ & Scipionis Africani, summo-

rum Imperatorum gloriam, quorum alter Regis Regum largitionibus, quibus oppugnabatur, renunciavit, præfatus, orbis terrarum divitias patriæ charitate sibi viliores esse: alter vero Antiocho, quæ prolixè offerebantur, se non egere respondit. Aggrediebantur Galli rem alia via, & cum se largitionibus ac promissis nihil efficere posse viderent, vi ac minis sapientissimum *Principem* labefactare, ipsique terrorem injicere studebant, minitantes, se agrum utrique Rheni ripæ adjacentem vastare, urbes delere, civesque trucidare velle. Jamque non modo diras istas horrendasque schedulas, quæ incolis exitium portendebant, plurimis vicis, urbiumque clarissimarum portis affixerant, sed & nonnullis locis jam funestos ac nefarios ignes intulerant. Alios vicisset populorum in tanto discrimine versantium miseratio, alii animum demississent, ac gravitate periculi, tanquam fluctibus, se obrui passi essent: Verum *Electo*r, licet incredibili desiderio æstualet, miseras gentes ex foedissima flamma & vastitate eripiendi, non potuit tamen in animum inducere, ut quicquam in se admitteret, in quo aut hostes gloriarentur, aut quod amici reprehenderent, aut quod sociorum animos ab armis



mis capeffendis deterreret, aut quod ceteris patriæ communis civibus damnosum effet ac noxium. Itaque non tantum vim hostium ac minas contemnebat, sed & invicta quadam animi magnitudine se contra erigebat, aquilæ instar, quæ splendorem solis spernit, ejusque radios, ad quos cetera conivent animalia, animose apertis oculis intuetur. Nequaquam tamen obliviscebaris, *Friderice Maxime*, Tuorum civium : Sed ne ullum amoris, studii, aut curæ pro illorum tutela, genus, deesse sibi intelligerent, ipse iniquissimo anni tempore ad eos, qui hostium furori quam maxime expositi erant, properabas, tantoque desiderio angebaris illos metu liberandi, ut volasse, non iter fecisse dicendus sis, ne fortassis tardius aliquanto, quam Tui temporumque necessitas requirebat, advenires. Advenisti opportune, ut ipse fortunæ occurfares. Ubi advenisti, omnium animos, qui metu vastationis, incendii, ferrique, late in vicinîa grassantis, perculsi ac prostrati jacebant, erexisti, spe læta omnes implesti, dubios confirmasti, quantum humana ratione fieri poterat, sapientissime providisti, ne quid detrimenti caperet publica privataque res, omnium commodis prospexisti, omnium fa-

G luti

luti ferveisti, denique aut cum Tuis vivere, aut pro illis mori optasti. Spes quidem aliqua posita erat in urbe Vefalia, quæ autem, cum incerta admodum esset ac dubia, quod vetus opus dirutum, novum autem nondum consummatum esset, operam dedisti, *Princeps Maxime*, ut urbs vallis, fossis ac mœnibus, quantum per hiemis & temporis rationem fieri poterat, muniretur, quo illa & incolarum animos in patientiam obsidionis, si forte Galli eam adorirentur, firmaret, & hostium impetum sustinere posset. His ita apud suos compositis, rapiebat *Fridericum* in Belgium suus in Belgas amor, suumque omnibus gratificandi desiderium, ut, quos pariter amabat, eos pari cura in rebus dubiis confirmaret, utque cum Rep. hac, qua nihil carius, nihil dulcius ipsi unquam fuit, id constitueretur, quod e re utriusque esse illo tempore credebatur. Non te vis hyemis, *Friderice*, non molestia itineris, non asperitas temporis retardabat, non tuorum, quibus adventus Tuus tam salutaris, vota a desiderio amicissimæ gentis adeundæ revocabant. Cum autem in Belgium venisses, quis populi concursus! quæ omnium Tui videndi cupiditas! quod Tui compellendi desiderium! Effundebatur



tur ex florentissimis urbibus ingens hominum ac infinita multitudo, Tibique, quam longissime poterat, obviam procedebat, quo & citius & diutius facultas daretur videndi Principem, cujus virtutem, sapientiam, beneque de se merendi prolixam voluntatem dudum suspiciebant, quemque alii unicum & certissimum Reip. hujus amicum, alii defensorem, alii patrem salutabant. Qua lætitia, quo cultu, qua amoris testificatione Te excipiebant, qui sapientissimis suis consiliis nobilissimas has provincias regunt, quique summæ Imperii præfunt! Ipsa Princeps Arausionensium, summum sexus sui decus, orbis amor, virtutumque omnium, quæ Reginas decent, venustissima sedes, in solitudine sua inter spem & metum fluctuans, incredibili gaudio exultabat, cum tam gratum tamque acceptum hospitem, in cujus illa sinum omnes animi curas effundere poterat, coram intueretur: quam & Tu, *Princeps Optime*, cum nesciret, conjuxne esset an vidua, adoptimam spem de pulcherrimis Conjugis ausibus erexisti, & ab omni sollicitudine abstraxisti, cum ejus Tu in tot malis ferendis constantiam, mirificamque virtutem & laudares, & Tuis consiliis confirmares. Quanto Tu quoque amore,

more, quanta benevolentia omnes admittebas! quanta mutuæ amicitiae significatione Illustres florentissimæ Reip. ordines complectebaris! qua animi propensione, cum ob hyemis sævitiam, insolitumque frigus, in magna sollicitudine versarentur plerique, Tuam opem, curam, laborem in Belgii tranquillitate tuenda promittebas! qua solertia, qua sagacitate, qua prudentia cum illis & de præsentium rerum statu deliberabas, & de futuris consilia formabas! Transegisset *Fridericus* reliquum hyemis in regionibus suis Belgio finitimis, quod & multi ab ipso petebant, & suorum salus postulare videbatur, verum necessitas ipsi imponebatur repetendi Berolinum, ut ea, quæ Patriæ essent saluti, cum Principibus vicini constitueret. Quorum plurimos sua auctoritate confirmavit, illisque, ut afflictissimæ patriæ, tantis miseriis periculisque septæ, succurrerent, suo persuasit consilio; quo sane nihil Germaniæ utilius, nihil sociis salutarius, nihil denique ad omnium temporum posteritatisque memoriam pulchrius ac gloriosius facere unquam potuit. Videbatur benignissimum Numen fortunare velle summam istam curam, quam *Princeps*, patriæ amore captus, dies noctesque pro illius liberta-



libertate ac dignitate fuscipiebat. Dum enim ipse consilio laborantis Germaniæ salutis subvenit, sui armis rem præclare gerunt. Ipsi enim una cum Belgis, propter Novesium, oppidum vetustissimum, & in bellis, ab antiquissimis Romanorum Imperatoribus olim in Germaniis gestis, cognitum, Gallos, qui id firmo tenebant præsidio, & quorum Dux erat Surditius, incredibili virtute aggrediuntur & singulari felicitate superant. Concursum est acerrime; nostris pro libertate patriæ, proque Imperii Germanici & sociorum securitate pugnantibus, hostibus vero Regis sui fortunam defendentibus, tantusque fuit pugnantium ardor, ut post diurnam gravissimamque pugnam cominus gladiis dimicaretur. Tantum autem valuit Brandenburgensium ac foederatorum virtus, ut hostes, qui cum maxima spe vincendi advenerant, fortiter disjicerent, disiectos superarent, superatosque turpi fuga terga dare cogerent. Nostri insequuntur acriter fugientes, multos in fuga interficiunt, majorque edita fuisset strages, nisi nox superveniens prælium, vel potius fugam, diremisset. Nostri victo hoste, qui denuo fortunam experiri non audebat, victores & spoliis hostium cæsorum onusti Novesium,

H                      ubi

ubi Galli hybernarant, intrant, & quod  
 suis copiis & apparatui bellico illi destina-  
 rant receptaculum, ipsi intercipiunt, &  
 sibi foederatisque constituunt. Jactate nunc  
 hostes vos fortunam in manibus habere, vi-  
 ctoriamque vos ubique comitari. Cognito-  
 vistis magna mercede fortunam belli esse in-  
 certam atque ancipitem, vosque æque vin-  
 ci posse ut ceteros mortales. Vidistis, eun-  
 dem Principem, cujus vos modo civibus  
 cædem, flammam, vastitatem, cruciatum,  
 tormentaue denunciabatis, primum fuisse  
 qui effræni vestræ libidini modum po-  
 fuerit, quique ferrum, quod vos inter  
 civium suorum latera impune vibrare vo-  
 lebatis, in viscera vestra adegit. Senti-  
 tietis porro, esse Principes in Germania, es-  
 se viros in foederatis, qui vobiscum conse-  
 rere manus audeant. Sentietis fortasse, ma-  
 gnas arbores diu crescere, sed tandem, &  
 sæpe una hora extirpari. Sentietis aliquan-  
 do fortassis, Deum, qui secundis rebus diu  
 impune sunt abusi, eos tandem pro meri-  
 tis ulcisci. Sed o insignem bonorum om-  
 nium lætitiā! o egregium fructum quem  
 felicissimus hujus proelii exitus, ac faustissi-  
 ma hæc belli auspicia omnibus attulerunt!  
 Quid non sperabimus de Tua virtute, *Fri-  
 derice,*



*derice*, qui prima congressione Ludovicum vincis? aut quam felicitatem non Tua semper secuturam signa credemus, si primus de iis triumphas, qui invictos se putabant, quique, si non armis, artibus certe per multos annos superiores fuerant? Quid autem mentis vobis erat validissimæ civitates Reinberca, Cæsaris insula, Bonna, cum videretis Brandeburgenfes & foederatos non sustinere tantum sed & fugare Gallos? Credo ego, vos, gaudii plenas, sperasse, jam instare tempus, quod vos imperio, a quo inauspicato & exemplo pessimo avulsæ eratis; redderet. Credo, vobis nihil longius fuisse, quam ut adveniret *Princeps*, qui, velut Hercules quidam, & vos & Germaniam monstrorum metu liberaret. Credo Vos jam prævidisse, eandem sortem manere præsidia Gallica, quæ vos oppresserant, quæque vos patriæ ereptas, contra patriam invitas tenebant. Nec vana fuisse pia vestra auguria, vestraque quæ præceperatis gaudia, docuit felicissimus rerum eventus, docuit divinitus adjuncta *Friderico* fortuna, docere magnificentissimi ipsius triumphi. Reinberca, uti in omnibus bellis in illa Germaniæ parte gestis, varia fortuna agitata fuit, propterea quod fossis muris variisque muni-

mentis cingitur ac ipso Rheno munitur, ita Galli, cum Coloniensem agrum invaderent, validum præsidium in urbe posuerant, idque, ad firmandam spem dominationis suæ, & optaverat & permiserat Furstenbergius, Pontifex Argentoratensis, & qui jam avida nimis spe pontificatum Coloniensem sibi ipse desponderat, fax & tuba hujus belli, qui si nunquam vixisset, Germania felicius fuisset. Quæ urbs, quoniam non mediocriter monumentum ad longius submovendos hostes foederatis afferre poterat, ex hostium manibus illam eripere unice studebat *Friedericus*, cumque sciret, sapientis esse, omnia prius experiri verbis quam armis, bellaque non minus ratione quam vi esse gerenda, consilio & conditionibus urbem capere maxime laborabat, quo factum, ut urbs munitissima, sine sanguine, sine cæde, sine dimicatione, divina *Principis* & foederatorum sapientia caperetur & imperio restitueretur. Dolebant hostes inclinari res suas in agro Colonienfi, fortunamque votis suis minus respondere. In magna tamen erant spe, fore, ut controversiæ, quæ inter Regem Daniæ & Ducem Holsatiæ jam diu ducebantur, in bellum erumperent, quibus rebus effici sibi persuaserant posse, ut dum Germa-



Germaniæ Principes ad illud sedandum concurrerent, illorum copiæ disjungerentur, sibi vero facultas daretur impune omnia igne ac sanguine miscendi, totamque Germaniam subjugandi. Foedum istud ac funestum consilium quo melius cederet, gravissimas istas lites, quasi fomite admoto, omni ratione alebant, animos ad pacem tranquillitatemque pronos variis dolis turbabant, alios promissis inescare, alios metu deterrere studebant. Verum nihil, nihil inquam egerunt. Nam id, in quo illi maximum sibi præsidium ac commodum positum esse credebant, incredibilem illis postea plagam imposuit, & unde illi deterrimum bellum, rerumque omnium perturbationem orituram sperarant, ibi spes lætissimæ pacis jucundissimique otii affulsit. *Prudentissimus* enim *Octovir*, quo nemo vel ad providenda futura perspicacior, atque ad avertenda mala, malorumque metum propulsandum animi consiliique præsentia plenior, cum aliis tota mente in id incumbibat, ut controversiæ istæ amicis conditionibus componerentur, idque ab illo tempore, quo primum Imperii gubernacula ceperat, per plurimos eosque sapientissimos Oratores multo sumtu, multoque labore, unice egerat.

I                      Tulit

Tulit tandem pulcherrimum curarum ac laborum suorum fructum, Duce Holsatiæ, post multas variasque disceptationes, in avitas terras ac pristinam dignitatem restituto, paceque in regnis septentrionalibus, quæ jam in mutua bella ruitura videbantur, mirabili felicitate stabilita. Galli vero interea temporis, everso tribunali Spirenfi, literis, tabulis, monumentis omnibus de Principum & privatorum litibus & fortunis per totam Germaniam, ablatis, nobilissimas quasque urbes acerbissimis tributis exhauriebant, exhaustasque, contra fidem ore datam & scriptis firmatam, flamma ac ferro debebant, segetes ac vineas, spem solamenque futurorum temporum, urebant, opulentissimis regionibus vastitatem inducebant, ita, ut summi Principes omnibus vitæ dignitatisque præsiidiis & ornamentis nudati, vix pagum reliquum haberent, quo reliquias laceratæ ac prostratæ fortunæ transferrent; Galli porro miseros cives, omnibus bonis spoliatos, in exilium ejiciebant, alios jugulabant, alios barbarorum more in captivitatem abducebant, maritos ab uxoribus, uxores a maritis avellebant; stupris, cædibusque omnia implebant, virgines, pueros, ætatemque imbellem



lem indignissime vexabant, denique Scythica quadam immanitate, & furore barbarorum barbaros antecedeabant. Quæ cum ad *lenissimum Principem* perferrentur, tantopere commovebatur, ut, relictis omnibus aliis rebus, omnem curam, cogitationem, mentem denique omnem figeret in perditissimarum ac miserrimarum gentium malis levandis. Cum alii foederatorum ad aliis subveniendum accurrerent, Ipse ad dioecesin Colonensem provolabat, quo eandem pestem, quæ ipsi impendebat, arceret, hostesque ex locis ab ipsis infestis deturbaret. Obstrinxerat sibi *Electo* ad bellum hoc & maximum & formidolissimum proficiscens, solenni jurejurando Hallensium fidem, idemque in aliis regionibus, qua transeundum erat, facere constituerat. Verum cum indies magis magisque cresceret periculum, non sinebat *Fridericum* quiescere sollicitudo de patriæ salute. Itaque iter ad Rhenum accelerabat, plus præsidii ponens in suorum civium fide, licet sacramento non essent in nomen ejus adacti, quam in jurisjurandi religione. Arcetissime enim jam sibi devinxerat populorum parentium, vel injuratorum animos, amore & benevolentia, cujus certissima pignora habebant,

bant, studium, contentionem, pericula & discrimina, quæ pro illorum salute & tranquillitate subibat. In officio & obsequio continendi sunt minis, pœnis, sacramentis, qui metuunt magis Principes quam amant, & quos ad nova consilia sollicitat dominationis impotentia. Videbatur præterea ipsum fatum hanc inaugurationis solemnitatem differri voluisse, quo populi illi postea simul & victori importunissimi hostis, & servatori suo, liberi solitique, majore cum lætitia & magis ex animi sententia jurarent. Ille itaque tanto animi ardore ad liberandam patriam ferebatur, ut dies noctesque maximis itineribus eo contenderet, quo omnium votis desideriiisque se sciebat expectari. Quis fatis dignis laudibus evehere possit insignem istum in patriam amorem, summam constantiam, excellentemque virtutem *Principis*, qui caput suum, ex quo tot gentium salus pendebat, quibusvis fortunæ telis objecit? qui vitam, cujus diuturnitatem omnium vota ipsi precabantur, pro libertate patriæ, pro sociorum incolunitate, pro religionis securitate, in summum discrimen adduxit? Magnum erat quod *Fridericus*, cum hæc tempestas erumperet, statim lectissimas legiones in subsidium laboranti



ranti patriæ mitteret: majus quod tanto copiarum numero ipsi succurreret, quantum per leges Imperii ab ipso exigere non licebat: quod vero, veluti Romanorum Decius, caput pro Rep: devoverit, quod, cum domi in otio & rerum omnium abundantia vivere posset, molestias & pericula suscepit, nullam cum hostibus certandi occasionem detrectarit, temporum aërisque injurias, non sine virium valetudinisque detrimento, pertulerit, omnium certe maximum est, nihilque eo, vel ad summam laudem gloriosius, vel ad annalium memoriam celebratius fingi ac excogitari potest. Simul atque advenerat *Fridericus*, quo miserrum gemitus, bellicque fortuna ipsum vocabant, eluxit in eo invictus ille ac in omnibus periculis præsentissimus animus, eximiaque rei militaris scientia, quam jam tum hauserat, cum magnum Parentem in bellis ab hoc in Pomerania gestis comitaretur, quæque post assidua meditatione tantopere fuit aucta, ut sagatarum artium peritia nulli concederet. Cæsaris insula primum fuit virtutis, bellicarumque rerum prudentiæ documentum, urbs antiquissima & a Trajano, uti fertur, olim condita. Huic Galli præsidium imposuerant, tum, quod in-

K                      genio

genio & manu sic erat munita, ut magnam spem ducendæ obsidionis, remorandique nostrorum arma, hostibus afferret, tum quod in ripa Rheni posita, Rheno qua vincula injiciebat. Ei cum admovisset, cui ipse præerat, exercitum Elector, cui accesserant copię Belgicæ ac Monasterienses, illico urbem arctissima obsidione clausit, eaque, quæ ad illam brevi capiendam necessaria videbantur, incredibili celeritate comparavit. Structi in formidinem hostium suorumque commodum suggestus summæ altitudinis, ex quorum fastigiis munimenta urbis tormentorum ictibus vehementissime quatiebantur. Missi quoque sunt in urbem globi, sulphure, nitro, illisque quæ alendo igni apta sunt, referti, qui inflammaverunt statim arcem, plurimasque ædes, & præfectum præsidio urbis subegerunt, ut illam postero die, quo igne oppugnari cœpta fuerat, *Friderico* traderet, ita ut prius caperetur, quam de oppugnatione paulo remotioribus quicquam constaret. Gratulabantur *Maximo Octoviro* de celerrima ista ac clarissima victoria summorum Regum Principumque Oratores, qui ipsi in castris præsto erant, mirabanturque omnes, qui fieri potuerit ut tantam urbem, tantis munimen-



nimentis instructam , tam firmo præsidio munitam tam brevi temporis spatio caperet , ut quasi simul & venisse & vicisse videretur. Sed videbant hostes nihil tam altum esse , quo Electoris sociorumque virtus non eniti posset , nihilque tam firmum , quod oppugnantium armis impervium esset. Itaque urbem , quam contra vim illorum ac felicitatem defendere se posse desperabant , victori permittebant. Posteaquam urbs in ipsius potestatem pervenerat , statim militum manum mittebat , quæ incendium restingeret , & a tectis ac fortunis incolarum vim flammæ defenderet , quantum alienus a Macedonum Rege Alexandro , qui ipse regiae persarum faces subjiciebat & flagrantis spectaculo fruebatur ! Insignis hæc mansuetudo cum mirifica quadam in Deum pietate conjuncta erat , cujus Elector illustrissimum ac pulcherrimum documentum dedit. Nam simulac urbem victor intravit , in vallo , quo illa cingitur , Deo immortali gratulatus est , Eique laudes ac grates dixit , sine cujus ope nihil humananas vires , nihil armorum robur valere judicabat. Destructis suggestibus , aggeribusque , disiectisque operibus , quæ oppugnandæ urbi posita fuerant , ac solo æquatis , quippe jam illa dedi-

K 2                      ta,

ta, quasi emerita ac munere perfuncta videbantur; Castellum Beulense, quod egregie munitum erat, expugnandum esse censebat *Maximus Princeps*: in quo subigendo etiam singulari quadam felicitate usus est. Illi enim, quibus hoc negotium commissum erat, globis ignivomis id infestabant, ac brevi summa alacritate singularique virtute capiebant, hostesque ex nido isto, quo se receperant, ejiciebant. Pars illorum capta, pars submersa, memorabilique justitiæ divinæ documento contigit, ut in navigium, in quod nonnulli ex hostibus, fuga salutem quæsitura, se præcipitaverant, globus igne repletus conjiceretur, atque ita hostes, qui victorum ferrum effugerant, in undis hausti perirent. Supererat Bonna, tanto majorem *Friderico* gloriam paritura, quanto difficilior & periculosior videbatur oppugnatio. Nam urbem, natura & ingenio loci firmissimam, Galli magni operis propugnalis tanta industria ac solertia munierant, ut nonnisi summa vi ac longissimo tempore subigi posset. Tenebatur præsidio validissimo decem millium lectissimorum militum, quibus imperatum erat, hanc urbem, a qua salus & gloria Gallorum pendebat, summa vi defendere, nec argento, nec sanguini præsi-



præfidiariorum parcere , ut obsidio quam longissime traheretur. Affluebat illa com-  
 meatu, frumento, firmataque erat omnis  
 generis instrumento bellico ad diurnæ &  
 acerrimæ obsidionis patientiam. Exerci-  
 tus quidem *Friderici* & mirabili flagrabat  
 cupiditate pugnandi, & nulla pericula, nul-  
 lumque hostem reformidabat, sed & mu-  
 nimentorum & hostilis præsidii robur suade-  
 bat, nihil agendum nimis calide, ne copię  
 nostræ, quarum multitudo non tanta erat,  
 quanta quidem requirebatur ad urbem ab o-  
 mnibus rebus ad repugnandum & vim ar-  
 cendam paratissimam impetu celeriter ca-  
 piendam, magno Germanici Imperii fœde-  
 ratorumque detrimento forte offenderent.  
 Obsidebatur a Cæsareanis Moguntia, ne-  
 que rerum Germaniæ facies permittebat,  
 ut inde quicquam subsidii sperari a nostris  
 posset. Præterea Buſlerius cum lectissima  
 Gallorum manu ad ripam Mosellæ conse-  
 disse nunciabatur, hoc consilio, ut obsessis  
 Bonnæ tempore subveniret. Tantis tamen  
 periculis, tantis, qui exhauriendi erant,  
 laboribus, non movebatur imperterritus  
*Friderici* animus. Nihil tam arduum, ni-  
 hil tanti operis videbatur, quod ipsum ab  
 obsidendæ urbis consilio avocaret. Post-

L                      quam

quam igitur urbem castris, valloque sepserat, tribunaliaque tormentis collocandis erigi curaverat, illico illam missis pyrobolis petebat. Resonabant tormentorum tonitru circumjacentes montes, omniaque colucebant flammis. Injecti enim globi ignis alimentis pleni subito plures urbis partes incendebant, inde latissime sparsa flamma, tecta, domus, templa, turrets corripiebant. Corruiebant subito incendio omnia: comburebantur opes, quas ex spoliis urbium & direptionibus agrorum hostes eo congefserant: omnia planctu, ejulatu, terrore, tumultu miscebantur: multi globorum imbre obruebantur: multi corruentium tectorum cineribus vivi sepeliebantur: nulla species mali deerat. Tantum abest, *Princeps Optime*, ut ex hoc spectaculo voluptatem ceperis, quod Neronem in Romanæ urbis incendio fecisse ferunt; ut potius lugeres, urbem tam vetustate originis & crebra fortunæ varietate, quam diuturna sede Electorum insignem, tristissimo incendio concidere, hostemque ex patriæ medullis igne esse submovendum. Sed ferendum erat, quoniam durum necessitatis telum & belli ratio acerbissima quæque remedia postulabat. Interim cum hostes æquissimas  
 pacis



pacis condiciones mira pertinacia rejicerent,  
*Elector sapientissimus* consilium cepit, illo-  
 rum vires paulatim & quasi lento morbo  
 frangendi, atque expectandi tempus, quo,  
 expugnata Moguntia, Cæsareanis subsidiis  
 nostræ copiae augerentur, quoniam suas fo-  
 ciorumque vires solas tanto discrimini sub-  
 jicere, nec tempus ferebat, nec e re patriæ  
 videbatur. Cujus semper tantam rationem  
 habebat, ut illam insigni moderationis do-  
 cumento suis commodis, suæque gloriæ  
 nunquam non anteferret. Namque dum  
 Bonnam obsidebat, vicinis regionibus,  
 quibus Buflerius imminebat, delecta manu  
 subveniebat, & robur floremque exercitus  
 sui Duci Lotharingiæ, Moguntiam maxima  
 virtute oppugnant, subsidio mittebat, quæ  
 tamen suppetiæ ex itinere redibant, quo-  
 niam ad illas urbis deditæ fama perferebatur  
 certis nunciis. Non longe post mitteban-  
 tur ex Cæsarianis & Hassiacis nonnullæ le-  
 giones, novis laureis ob ereptam Gallis Mo-  
 guntiam ornatae. Igitur *Fridericus* jam &  
 viribus paratior & securior non diutius cun-  
 ctandum ratus, oppugnationem urbis ma-  
 gna vi, magnoque impetu aggrediebatur,  
 atque illico fossis flexuosis muros subire pa-  
 rabat, paucorumque dierum spatium res eo  
 L 2 perdu-

perducebatur, ut succinctus capiendi spes  
 esset. Galli contra incredibilem globorum  
 copiam in castra obsidentium ejaculabantur,  
 ac crebris eruptionibus opera illorum infe-  
 stabant, nihilque segniter exequiebantur,  
 quod in acerrima defensione urbium fieri,  
 aut ad officiendum obsidentibus excogitari  
 potest. Verum hos, quoties eruptiones  
 faciebant, *Maximi Octoviri* ac sociorum  
 piæ singulari virtute rejiciebant, sibi-  
 que & hostium cæde & improbo labore,  
 quem in operibus perficiendis dies noctes-  
 que ponebant, viam ad victoriam ape-  
 riebant. Cum vero adesset tempus,  
 quod invadendæ urbi dictum erat, excel-  
 lentissimæ virtutis, summæque prudentiæ  
 nova documenta *Fridericus* edidit. Et  
 hortationibus & propositis præmiis militum  
 animos ad pugnam fortiter capeffendam ac-  
 cendebat, omnia, quæ necessaria videban-  
 tur, parabat, providebat, totius oppugna-  
 tionis modum & suas cuique partes, loca-  
 que, quæ subeunda erant, describebat, ita  
 ut nihil prorsus desideraretur, nihil singuli,  
 quid sibi agendum esset ejus imperio, igno-  
 rarent. Postea adscitis Ducibus, quos huic  
 negotio præficere decreverat: „Vos, inquit,  
 „viri fortissimi, ex omni exercitu elegi,  
 „qui-



„ quibus patriæ salutem, Germaniæ secu-  
 „ ritatem, nominisque Brandenburgici glo-  
 „ riam tutanda traderem. Novi vestrum  
 „ in patriam amorem, vestrum erga me ani-  
 „ mum, vestramque virtutem. Illuxit dies  
 „ ille, quem tam diu tanto desiderio expe-  
 „ tiistis, quo virtutem vestram orbi terra-  
 „ rum testatam faciendi, omnique posteri-  
 „ tati commendandi, facultatem habetis.  
 „ Dextris vestris recuperanda est civitas,  
 „ quam hostes artibus ceperunt, neque fe-  
 „ rendum, ut illi diutius ibi scelerum perfu-  
 „ gium habeant, ubi ab antiquissimis tem-  
 „ poribus sedes Electorum Germaniæ fuit.  
 „ Res est nobis cum hoste, qui injusto pror-  
 „ fus bello nos invasit, qui vincula Germaniæ  
 „ parat, qui nihil divinarum humanarum-  
 „ que rerum sanctum habet, quique omne  
 „ crudelitatis genus in parentes vestros, in  
 „ fratres, in cognatos, in totam Germa-  
 „ niam edit & sæviora minatur. Pugnatis  
 „ hodie pro majorum gloria in oculis totius  
 „ Europæ, quæ factorum vestrorum testis  
 „ & arbitra, de iis nunquam conticescet. Pu-  
 „ gnatis pro patriæ salute, qua nullum acrius  
 „ telum ad vincendum ex celsis animis un-  
 „ quam fuit. Huic animam bonus quisque  
 „ debet, ac pro illa mortem oppetere, ipsa vi-

M

„ ta

„ta dulcius est ac pulchrius. Bello laceffiti  
 „tanto fortius dimicabitis, quanto iustior  
 „causa ac certior victoriae spes est ejus, qui  
 „vim arcet. Vidistis, Deum ipsum cau-  
 „sam nostram agere, quoniam a nobis jus  
 „stat. Is porro pro vobis pugnabit, & per  
 „medios hostes aditum patefaciet. Bellum  
 „hoc hostium potius, quam nostris cladi-  
 „bus insigne fuit. Illi nunquam nisi malis  
 „artibus vicerunt, vos autem armis semper  
 „superiores fuistis. Ipsi focii vestri, quos  
 „capta Moguntia, laureis redimitos cerni-  
 „tis, spem faciunt hujus oppugnationis  
 „eundem exitum futurum. Quem hostem  
 „vos modo ferociter vobis insultantem vi-  
 „distis; eundem nunc armis vestris undi-  
 „quaue clausum, virtutemque vestram ex-  
 „timescentem, trepidare videtis. Multi ex  
 „illis caesi, multi morbis ac fame confecti.  
 „Has reliquias facile superabitis. Vestram  
 „virtutem Deus, superbiae, injuriarum ac  
 „scelerum vindex prosperabit: illos tanto-  
 „rum facinorum & malorum, quibus inson-  
 „tes affecerunt, conscientia confundet.  
 „Nostis ipsi, quanta miles pugnandi cupidi-  
 „tate ardeat, ne partarum nuper victoriarum  
 „laus obfussetur. Videtis, qua sint alacri-  
 „tate focii recenti victoria Moguntina de-  
 „cori.



„cori. Omnia quæ ad oppugnandam ur-  
 „bem necessaria fuerunt, a me sunt com-  
 „parata. Nihil vobis deest, nisi vos vobis  
 „ipfi deesse velitis. Non jam in limine,  
 „sed in exitu hujus militiæ versamini. Hu-  
 „jus diei felicitas præmium periculorum ve-  
 „strorum, & terminum laborum dabit. Op-  
 „pugnatis moenia unius urbis, sed una urbe  
 „capta, liberabitis totum hanc regionem  
 „omnesque vicinas Imperii provincias, e-  
 „andem habituras fortunam, qualem hæc  
 „obsidio habuerit exitum. Nunquam enim  
 „illæ otio fruuntur, quousque hostes in hac  
 „spei salutisque suæ arce dilitescent. Nihil  
 „patriæ salutaris, nihil ad sedandum hoc  
 „bellum utilius præstare poteritis, quam si  
 „hostem ex hoc latibulo submovebitis. Si,  
 „quod Deus avertat, vincimur, ludibrio  
 „erimus hostibus superbissimis, nominique  
 „Germano æternam ignominiam inuremus.  
 „Neutrum fiet, si viri eritis, eritis autem, si  
 „a toties spectata virtute non desciscetis. Si  
 „vivi, victoresque redieritis, vestram virtu-  
 „tem novis honorum & fortunæ insignibus  
 „ornabo: sin qui ex vobis occubuerint, illo-  
 „rum laus & gloria æternum vivet, illo-  
 „rumque conjugum & liberorum ego pater  
 „ero. Ite viri fortes, asserite Germaniæ  
 M 2 „salu-

„salutem, ac vindicate pignora vestra ab  
 „injustissima & impotentissima dominatio-  
 „ne, quæ omnium cervicibus impendet.  
 „Ite quo majorum gloria, quo patriæ socio-  
 „rumque salus, quo miserorum lacrymæ  
 „vos vocant. Propagate ad posteros vestros  
 „decus quod a maioribus accepistis, cujus-  
 „que ipsi semper tam egregii vindices fuistis.  
 „Deo duce & auspice vestram fortitudinem  
 „fortunante, brevi hæc urbs nostra erit. E-  
 „volant a Principis conspectu ad optatum  
 „triumphi decus, & memores, pro quo, &  
 „contra quos pugnarent, magnis animis o-  
 „pus hostile adoriuntur. Ex illis, qui in pri-  
 „mo agmine erant, multi interfecti, multi  
 „vulnerati, quia hostes in via cooperta ad su-  
 „stinendum illorum impetum parati, incredi-  
 „bili glandium multitudine illos excipiebant.  
 „Sequentium ora respergebantur eorum  
 „sanguine, qui concidebant. Verum non  
 „commilitonum miseratio, non periculi ma-  
 „gnitudo, non morientium fractæ voces,  
 „non denique cruor ex pulcherrimis cæso-  
 „rum vulneribus effluens viros a speratæ vi-  
 „ctoriæ gloria revocabat, sed instabant, ur-  
 „gebant, nitebantur, quo se attollere hu-  
 „manus animus ac fortissimi cujusque virtus  
 „potest. In hoc tanto motu rerum, inter tu-  
 „barum



barum clangores ac tympanorum strepitus, stimulos illos ac incitamenta virtutis, milites iter ad victoriam sibi vi & armis patefaciebant, ac exteriorem fossæ muralis loricam brevi incredibili virtute expugnabant. Fecerant, quæ imperata erant, sed ardor pugnae animique impetus ipsos ulterius in medios hostes agebat, quibus mixti, gladiis, pugnis, aliisque, quæ furor subministrabat, armis, rem gerebant, reliquosque hostes, quos sua felicitas ex cæde ac flumine sanguinis eripuerat, turpi fuga in urbem properare compellebant. Inde invicta animi alacritate ac inusitata ultra humanum modum fortitudine duo propugnacula portæ obtenta capiebant, atque in illustrissimis istis gloriæ theatris constituti, hostibus terrorem injiciebant, suis vero lætissimum spectaculum præbebant. Jam alii scalas, quibus muros ascenderent, petebant, alii portas effringere studebant, verum *sapientissimus Princeps*, qui non tantum animose ac fortiter, sed etiam considerate ac sapienter bellum gerebat, eorum impetum velut generosorum equorum cohibebat, quod & humanitatis ducebat tot egregias animas fervare, & prudentiæ, hostes non ad desperationem redigere. Ingruebat etiam nox,

N

quæ

quæ quasi accelerare videbatur , ut tam cruentam pugnam dirimeret , animosque meliore fato dignos a mutua cæde revocaret. Nulla ætas tam erit immemor , nec unquam *Friderice* , fama tam ingrata , quæ non fummis in cœlum te laudibus evehet , quas cum virtute ac sapientia , quæ , quicquid domi forisque geris , effulget ; tum vero paterno & incredibili quodam amore in tuos cives ac milites , maxime meritus es , cum eorum , qui pro patriæ incolumitate honestissime occubuerant , fata , tantopere doleres ; cum militum , non secus ac liberorum tuorum , quæ in acerrimo post hominum memoriam conflictu acceperant vulnera , foveri , & omni salutarium remediorum genere diligentissime curari præciperes : cum cœteros , qui , re præclare gesta , tantis ex periculis , tanquam ex inferis , emerferant , ad exemplum priscorum heroum , magnis præmiis & congiariis honestasti , qui , quæ es sapientia , non ignorabas virtutem ali & inflammari honore. Non possum mihi imperare , ut hic tacitus præteream eximiam & omnibus seculis commemorandam virtutem & constantiam militis , quem Cæsar , Batavi , Hassus ac Monasteriensis Antistes subsidio miserant , qua irruerunt  
in



in hostes, qua subierunt valla & muros contra tantam vim & robur illa summavi tuentum. Nemo cessabat, nemo cunctabatur. Omnes in hanc curam cogitationemque incumbabant, ut ducum imperia factis quasi anteverterent, & ad ea strenue conficienda, quæ imperata erant, nec sudori nec sanguini parcerent. Videbant tunc Galli sibi rem esse cum viris, qui & acriter pugnare, & fortiter vincere scirent. Ingens enim Ducum, Præfectorum & militum gregariorum copia ex illis desiderabatur, ipseque Asfeldius, qui urbi præerat, gravi vulnere confectus erat. Itaque postero die hic mittebat, qui condiciones dedendæ urbis moverent, quas *Electores*, quoniam pro illorum afflictæ fortunæ ratione ferebant iniquiores Galli, primum rejiciebat, tandem vero tolerabiliores convenerunt. Præsidiorum tria millia admodum supererant, quos Luxemburgum comitante suorum manu duci præcipiebat, miseræ suæ fortis & hostium virtutis ac victoriæ nuncios. Suadebant non nulli, *Friderice*, ut urbem vi caperes, atque ab hostibus poenas injuriarum, quas per multos annos toti pene terrarum orbi intulerant, fumeres, ac fane, si militum tuorum pugnae ac vindictæ cupidi-

tate ardentium voces audire voluiffes, ho-  
 ftium internecone expianda fuiſſent tanta  
 mala, quæ Germaniæ circaque dederant,  
 patiebaturque fortuna tua, ut illud facere  
 poſſes, ſed ut velles, a natura tua ad leni-  
 tatem ac clementiam facta, non poteras  
 impetrare. Hoſtes enim tunc ſe permitte-  
 re volebant Tibi, cum jam non eſſent fui,  
 offerebantque deditionem urbis quam non  
 licebat diutius tueri. Tu autem memorabi-  
 li quadam ac inaudita clementia illos excepi-  
 ſti, exceptoſque audiviſti, deteſtatus tri-  
 umphos ubi crudelitas, devictorum gemitus,  
 captivorumque vincula lætitiæ victoris gra-  
 tulantiumque vocibus obſtrepunt. Itaque  
 ne plus ſanguinis humani funderetur, con-  
 ſilia illa damnaſti, & hoſtium crudelitatem  
 lenitudine, faſtum modestia, furorem vir-  
 tute, injurias animi magnitudine vindica-  
 ſti. Maluiſti injuriarum quam tuæ lenitatis  
 eſſe immemor, cumque hoſtes viciffes, do-  
 lorem vincere neceſſarium pulchrumque  
 duxiſti. Expleviſti, *Friderice*, vota Invi-  
 ctiſſimi Imperatoris, qui tutelam provincia-  
 rum iſtarum Tibi tradiderat. Urbes mu-  
 nitiffimas, alias igne, alias conſilio, alias  
 armis cepiſti. Coloniam & reliqua dioece-  
 ſeos Coloniensis oppida a flammis, agros a  
 popula-



populationibus, incolas a servitute, a cæde, a sanguine vindicasti. Gratias Tibi agunt urbes, agunt agri, agit ipse Rhenus, qui undas nunc suas libere placideque volvit, quique navigiorum, quæ undique in illo natant, patiens, ante tuum salutarem adventum ab hostibus tanquam tempestate brumali clausus & obsessus erat, ac nulla nisi hostilia ferebat. Felices nimium agri Colonienſis incolas, si sua bona noſſent! Conjicite oculos in terras, quas hostium furor occupavit, & quo in loco res veſtræ ſint, perpendite. Adſpice Palatinatum, intuemini dioceſin Trevirenſem, aliasque quam plurimas regiones, quæ vos veſtræ felicitatis admonent. Videtis ibi urbes antiquitate & opibus nobiliſſimas luſtuoſiſſimo incendio deleri, licentiam hostis in vexando omnes incolas miſere debacchari, ſepulchra Imperatorum ſpoliari, ipſosque cives, ne qua crudelitates ſpecies ſuperſit, ad faces tectis ſuis inferendas cogi. Cernitis ibi arcem Heidelbergenſem, decus Germaniæ, cui in tantis bellis, inprimis illo tricennali hostis pepercerat, in ruderibus & cineribus jacere. Cernitis Spiram, Wormatiam, Manhemium, aliasque urbes, quarum memoriam & ipſa multitudo & dolor pectus meum effodiens,

O                      mihi



mihi subducit, velut Trojam quondam aut Carthaginem dirutas ac everfas. Vestra vero moenia, vestra tecta beneficio *Friderici* servata. Templavestrapersonant laudibus Dei, in forisjus dicitur. Ejecti ibi cives & incolæ ex urbibus sedibusque avitis extorres vagantur, ut ne quidem sint, qui excisarum urbium nomen deplorare queant. Ne nunc quidem in illis parietinis conceditur miseris contra coeli ferarumque injurias latebras quærere. Vobis *Friderici* virtute fortunæ, bonaque vestra salva sunt, vos agros vestros, vestras vineas in spem futuri temporis colitis. Ibi incolæ, sed quid dico incolæ? imo miserrimi isti exules, omniumque mortalium infelicissimi, pristina fortuna exuti, a conjugibus, parentibus ac liberis divulsi, in solitudine sylvisque, quas hostium sævitia reliquit, errant, ac a consuetudine hominum remoti, inter feras, hostibus ipsis mitiores, miserrimam animam trahunt, ubi inopia fameque confecti, mortem tanquam unicum levamen, miserrarumque omnium finem & optant & expectant. Vos cum conjugibus, cum liberis, cum propinquis vestris, tanquam e naufragio, evasistis, idque *Electoris Brandenburgici* munere, qui vobis hæc otia fecit, dum militum



litum suorum præsidio hostium gladios, tot innocentium sanguine stillantes, a jugulis vestris arcet. Tibi vero subjectæ gentes, *Friderice*, agnoscunt gratissima mente beneficia tua, propterea, cum Cliviam victor redires, summo ac incredibili gaudio exultabant. Tanta erat populi effusio, tanta omnium acclamatio, tantum denique omnium tui videndi desiderium, quantum vix animo concipere possunt, qui oculis non usurparunt. Te, ut hostium victorem, Germanicæ libertatis assertorem, agrique Clivenfis servatorem summis in cœlum laudibus efferebant, Teque eo majore lætitiæ significatione excipiebant, quod, quantum Tibi deberent, probe intelligerent, quoniam ex ipsis mœnibus suis flammam hostilem prospexerant. Cujus summi ac incomparabilis beneficii imago, cum ipsis semper ante oculos versaretur, non inveniebant, qua ratione gratum Tibi animum satis certis argumentis approbarent. Erecti erant arcus triumphales, qui, licet non crustis Numidicis aut Pario marmore, sed floribus, quos terra mater fundit, nitebant, tamen aspectus eorum tibi erat multo jucundissimus. Adspiciebas enim illos tanquam monumentum verissimi amoris, quo Tui Te

O 2            cives

cives prosequuntur, non secus ac Dii, quibus gratius est lac & far pio animo oblatum, quam Falernum & thuris acervi, quos adolent beatiores sed minus religiosi cultores Deorum. In Titum Vespasianum, cum, domitis Judæis, captisque Solymis, Romam reverteretur, populus Romanus flores sparsit. Idem Tibi contingebat *Princeps Optime* generisque humani delictum, cum Cliviam intrares, eundemque in Te amorem præ se ferebant vel ipsi pueri puellæque, quorum ætas adulandi artes ignorabat, quique, etsi quæ grates Tibi agendæ essent, nescirent, tamen habendas sciebant, quasi jam in ista annorum simplicitate cognovissent, se evasisse gravissimam istam calamitatem, quæ maxime ad ipsos olim redundatura fuisset. Tanta vero erat tua in isto felicitatis gradu, gloriæque cumulo, animi moderatio, ut nullum præmium virtutis, nullum insigne honoris desiderares, præter amorem civium tuorum. Dum autem ipse omnia honorem ornamenta spernebas, forte fortuna, de quo nemo cogitaverat, quodque admiratione omnis ætatis dignissimum est, Tibi albus equus offerebatur, quo Cliviam introibas, ut ita eorum, qui Romæ triumphantes, albis equis trahebantur, glo-



riam exæquares, ipsaque forte ac casu Tibi tribuente honorem, qui ob maximam victoriam Tibi debebatur, quemque singularis tua modestia longissime rejecisset. Quanto autem majore lætitia Te exceperant Tui; tanto majore alacritate fidem, quam nunquam violaverant, jurejurando Tibi obstringebant, atque, uti summam ex adventu Tuo ceperant voluptatem, ita cum inde discederes, non minori cruciabantur dolore, optabantque omnes omnino uno ore, ut quam diutissime Tui eis copia daretur. Verum quoniam cura ista, quam *Fridericus* pro patriæ salute gessit, non unius regionis finibus circumscribebatur, sed latissime diffusa omnes suo imperio commissas terras, omnesque Europæ partes complectebatur: ille Berolinum properandum putabat, quo tum suorum vota, tum temporum necessitas, ipsaque Imperii Romani incolumitas ipsum vocare videbantur. Quid dicam de insigni ista lætitia, qua Ravensbergenses ac Mindenses populi Electorem excipiebant, cum per illorum fines & urbes caput sibi parentium terrarum repeteret? Quid de summa ista alacritate & fide qua omnes in verba & nomen ipsius jurabant? Quid de lætissimis istis acclamationibus quibus de tanto

P                      trium-

triumpho, gloriosissimo victori hostium reduci gratulabantur, quem paucis ante mensibus abeuntem faustis ominibus ac piis votis prosecuti erant? Quo vero omnia tuta post se relinqueret, regionesque, quæ hostium incursionibus maxime patebant, contra illorum irruptiones & compilationes munirentur: *Electo* prudentissimus copias quasdam in finibus Colonienfis & vicini agri collocavit. Fuere tamen, qui, sive quod sibi in se satis præsidii esse putarent, sive quod magnitudinem imminentis periculi non caperent, hyberna gravabantur. Itaque *Fridericus* legiones istas in suas terras proficisci jubebat, quippe qui nemini oneri, omnibus autem salutis esse, semper optaverat. Verum isti brevi magno cum detrimento didicerunt, male se sibi consuluisset, quod copias istas non admisissent. Galli enim, subita irruptione facta, multos agros diripuerant, pagosque complures ufferant. Tum vero regiones illæ, quæ præsidia paulo ante repudiaverant, poenitentia ductæ, summo studio illa a *Friderico* petebant, qui, quoniam omnium facile obliviscebatur, quando patriæ utilitati consulendum erat, statim validissimo ac firmissimo præsidio agrum Juliacensem, Montanum



num & Colonienſem ac Aquifgranum contra vim hoſtium communivit. Tum levatæ fuerunt trepidatione gentes , quæ ſingulis horis excidium expectabant , ipſaque hæc vetuſtiſſima & celeberrima Caroli Magni , aliorumque Imperatorum regia ſedes Electoris beneficio ſervata gaudet & triumphat: Tibi, inquit, *Princeps Maxime* , Tibi gratias ago immortales , quod mihi ſubveneris , cum graviſſimis periculis ac ærumnis circumvallata eſſem. Tu a civibus meis direptiones ac cædes defendiſti. Tu a templis , a tectis , a mœnibus meis ferrum hoſtium repuliſti. Tuum eſt beneficium , quod flamma hoſtilis me non deleverit. Tu nobiliſſima iſta Imperatorum inſignia , quæ nuper admodum Joſephum , Romanorum Regem , ornarunt , ex hoſtium manibus eripuisti. Tu thermas meas , quæ tot miſeros ex graviſſimis morbis recrearunt , ſervasti. Tu Tuo conſilio laboreque effeciſti , ut dulci otio fruar. Cum igitur patriam ſervaffet , ſuorumque ſaluti proſpexiſſet *Electoꝝ Sapientiſſimus* , aliis omnibus , ſibi ipſe non ſatiſfecit. Non enim contentus horridam tempeſtatem propulſaſſe , in futurum conſulebat. Cernebat atram nubem impendere communi patriæ , ſævis

procellis ac turbinibus omnia foedaturam , nisi consilio dissiparetur : non posse autem illam dissipari , nisi spes improba illorum , qui Romanum Imperium affectabant , præcideretur : præcidi vero illam spem non posse , nisi Rex Romanorum crearetur. Hinc omnium curarum antiquissima illi erat , ut , in quod fastigium beatissimus Parens Leopoldum olim suo suffragio extulerat , in illud ipse proveheret Principem juventutis , Leopoldi Magni filium , Josephum , Hungariæ Regem , quem benignæ naturæ quasi manu fictum esse sciebat ad hanc personam , ubi adolevisset , sustinendam. Tantæ in illo dotes , tanta virtutum omnium , quæ ad tanti imperii clavum moderandum desiderantur , indoles elucebat , ut ætatem longe anteverterent. Fortes fortibus creantur. Nullus dubitat , quin aliquando magni Patris vestigiis intentus Germanorum imperium ex omnium sententia sit recturus. Leopoldus fane Augustus divina quadam ac prorsus admirabili sapientia , virtute , ac felicitate , Germaniæ præsidet imperio , qui , quæ majores ipsius ne sperare ausi sunt , gessit , cujus denique virtutum , victoriarum , rerumque gestarum gloria terrarum orbem pervagata est. Hac cura



cura defunctus es, *Friderice*, secunda bonorum omnium, Germaniæ civium, sociorumque voluntate. Quibus laudibus vero Tuam sapientiam prædicabimus, *Optime Principum*, qui Borussiam, regionem pulcherrimam & beatissimam, tantisque locorum intervallis a nobis sejunctam, inter tot bellorum procellas tranquillam pacatamque servasti, & ab illa omnia pericula ac infidias depulisti? non secus ac gubernator, qui navem ex hyeme, procellarum rabie, marique scopuloso servavit. Quantæ Tibi debentur grates, quod, cum tanta amoris documenta in Occidentem edideris, cura Tua quoque Orientem complexus fueris? quod Borussiam, in qua primam lucem hausisti, alienissimo anni tempore adieris? quodque ea, in quibus ejus salus vertitur, saluberrime ac prudentissime constitueris? Triumpharunt equidem Borussiae populi, ubi de Tuo adventu ad illos fama pervenit, idque rebus testati sunt, cum Te tanta lætitia, tanto applausu, tantis acclamationibus omnis ordinis, sexus, & ætatis exceperunt, ut fidem omnem superent & dubium sit, utrum majus fuerit desiderium, quo Tuum adventum expectarunt, quam gaudium, quo, cum advenisses, exultabant.

Q

bant. Magna sunt *Friderice*, quæ a Te gesta sunt, & licet tantum biennium Imperii clavum tenueris, tanta tamen gessisti, quæ paucissimi Principum vix longissimo vitæ spatio patrarunt. Nullius fane tanta ingenii vis est, tantumque dicendi flumen ac copia, quæ res Tuas gestas, Tuasque virtutes cogitatione, nedum verbis assequi digne possit. In Te unum congesta sunt omnia, quæ singula in singulis admiramur. Tibi parta est tuis maximis in humanum genus meritis autoritas, quam suscipiunt cives, quam omnis Germania veneratur, quam focii in coelum tollunt, quam hostes reformidant, quam exteri mirantur, quam denique tota Europa colit. Servet Te Deus, Pater Patriæ; servet *Augustam*, orbis delictum, populorum Tuorum matrem, Principem superis, quam hominibus similiorem: servet divina Tua pignora, quæ nostræ salutis & beatitudinis pignora sunt, faxitque, ut aviti tot populorum imperii possessionem sero transferas in posteritatem, non nisi cum fine rerum interituum: Largiatur Deus Tibi, *Princeps Optime*, ætatem, quam virtus Tua mereatur, de nostris Tibi largiatur annos: Respondeant omnia votis tuis: Sufficiant vires,



res , quibus sustinere possis gravissimam  
 istam curarum molem , quæ Tibi incum-  
 bit : Fortunet consilia honestissima & san-  
 ctissima : Prosperet arma , quæ pacis causa  
 & pro salute patriæ suscipis , ut quocunque  
 incedis , Te gloria , fortuna ac triumpho  
 comitentur : Vive diu mortalium amor , &  
 cum melior sis Trajano , felicior sis Augu-  
 sto : Floreat Brandenburgica domus ætati-  
 bus seculorum innumerabilibus.

D I X I.



1. The first part of the book is a  
general introduction to the subject  
of the history of the world.  
It is divided into two parts.  
The first part is a general  
introduction to the subject  
of the history of the world.  
The second part is a general  
introduction to the subject  
of the history of the world.

2. The second part of the book is a  
general introduction to the subject  
of the history of the world.

3. The third part of the book is a  
general introduction to the subject  
of the history of the world.

4. The fourth part of the book is a  
general introduction to the subject  
of the history of the world.

5. The fifth part of the book is a  
general introduction to the subject  
of the history of the world.

6. The sixth part of the book is a  
general introduction to the subject  
of the history of the world.

7. The seventh part of the book is a  
general introduction to the subject  
of the history of the world.

8. The eighth part of the book is a  
general introduction to the subject  
of the history of the world.

9. The ninth part of the book is a  
general introduction to the subject  
of the history of the world.

10. The tenth part of the book is a  
general introduction to the subject  
of the history of the world.









